

**Naalakkersuisut inuit tarnimikkut nappaatillit amerlanerit aamma ajuutillit ilinniakkaminnik aallarteriikkaminnik naammassinninnissaannut suliniuteqarnissaannik peqquneqassasut Inatsisartut aalajangigassaannik siunnersuut. Tamanna ilaatigut pisinnaavoq inuit peqannginnerusinnaanerit periarfissiissutigalugu aamma ilinniarnep sivilissusia akuereriikkamit sivitsorlugu.**

(Inatsisartunut ilaasorta, Paneeraq Olsen, Naleraq)

### **Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerneqarnera**

Naalakkersuisut sinnerlugit Inatsisartunut ilaasorta, Paneeraq Olsen, Naleraq aalajangiiffigissasat siunnersuuteqarnera pillugu qutsavigerusuppara.

Meeqqat inuusuttullu tarnimikkut nappaatillit ilinniakkamik ingerlataqarlutik peqataasinnaanerit aamma naammassinnissinnaanerit sulissutigissagippat Naalakkersuisuniit isumaqatigaarput.

Naalagaaffiit Peqatigiit inuit innarluutillit pisinnaatitaaffii pillugit isumaqatigiissutaata atuutsinneqarnissaanut nunarput atsiornikuuvoq. Tamannalu pisussaaffeqarpoq.

Tassunga tunngatillugu taaneqarsinnaavoq Naalakkersuisut Nunatsinni Iliuusissatut Pilersaarut annertoq suliaralugu aallartissimammassuk innarluutilinnut pisussaaffigut malinneqaqqullugit. Iliuusissatut pilersaarummik suliaq angusaqarluarnissamik siunertaqartoq Naalakkersuisoqarfiit assigiinngitsut akimorlugit qanimut suleqatigiiffiuvoq. Peqatigiilluta anguniarparput atukkat pitsannorsarneqarnissaat qulakkeerlugulu inuit tamarmik ersittunik ersinngitsunillu innarluuteqartut inuiaqatigiinni inunnt allanut naligiissinneqarlutik pineqarnissaat immikkoortuni tulluurtunik naleqqussaannikkut.

Taamaattumik ilinniartitaanerup nukittorsarneqarnera innarluutilinnut Nunatsinni Iliuusissatut Pilersaarutissap sinaakkusiussaata iluani maannakkut suliarineqalereerpoq. Inatsisiliarisimasagut misissorpagut. Ilinniartitaanerup iluani suliniutit aallartinneqarsimasut misissorpagut. Ilinniarnertuunngorniartarneq GUX-S taajumavara, tassaasoq inuusuttunut nappaatip suussusersineqarnikunut ilinniarnertuunngorniartarneq. Inuusuttuaqqanut immikkut ilinniartitaanernut immikkoortortaqarfik nukittorsassavarput, taamaalillutik ilinniartut ilisimatusartullu nappaatip suussusersineqarnikut pillugit inuusuttut, ilaqutaasut aamma ilinniartit siunnersorneqarsinnaaqqullugit.

Ilinniartitaanermili suliniutit ikorfartuinerillu nutaat aamma aallartissavagut. Ilinniartitaanermi ikaarsaartarfinni pitsannorsaalluni meeqqanut, inuusuttunut inersimasunullu ersittunik ersinngitsunillu innarluutilinnut suliniuteqassaagut. Innarluutilinnik sullissisut pitsaasunik ilinniaqqittarnissaat qulakkeerneqassaaq. Innuttaasunut nalinginnaasumik ilinniakkanik naammassinnissinnaanngitsunut suliffeqarnermit pisariaqartinneqartut piginnaasat pillugit ilinniakkat nutaat neqeroortugineqartussat ineriartortissavagut.

Ilaatigut aallartereerpugut allatigulli aatsaat aallartinniarsarivugut. Innutaaqatitsinnut ersittumik ersinngitsumilluunniit innarluutilinnut akimmiffiusartut peerneqarnissaannut pisussaaffeqarpugut, taamaaliornikkut ilinniakkamik naammassinnissinnaangussapput, suliffeqarsinnaangussapput sunngiffimmilu neqeroorutinut peqataasinnaangorlutik.

Siunnersuut tapersorneqartariaqartutut nalilerlugu akuersissutigineqarnissaa Naalakkersuisut inassuteqaatigut.